

四庫全書

集部

欽定四庫全書

集部

瑤石山人稿卷二

詳校官監察御史_臣曹坦

中書_臣劉源溥覆勘

總校官編修_臣王燕緒

校對官中書_臣陳木

謄錄監生_臣羅俊

欽定四庫全書

集部六

瑤石山人稿

別集類五

明

提要

臣等謹案瑤石山人稿十六卷明黎民表撰
民表字維敬從化人嘉靖甲午舉人授翰林
院孔目遷吏部司務以能文用為制勅房中
書後加官至參議明史文苑傳附見黃佐傳
中史稱佐弟子多以行業自飭而梁有譽歐

大任及民表詩名最著朱彝尊靜志居詩話
謂民表詩讀之似質悶而實沉著堅韌王世
貞所取續五子無愧大小雅材者僅此一人
是集前有萬厯戊子陳文燭序稱民表請老
以歸話別三山曾序其詩鎮江鍾太守刻焉
又稱民表已下世其子吏部郎君華袞刻此
集復屬以序蓋民表詩凡再刻也其初刻今
未見此刻冠以賦三首餘皆古近體詩雖錯

采鏤金而風骨典重無綺靡塗飾之習蓋與
太倉歷下同源而派則稍異焉故雖與王道
行石星朱多炏趙用賢同列為續五子而終
非四人所可及焉乾隆四十六年閏五月恭
校上

總纂官臣紀昀臣陸錫熊臣孫士毅

總校官臣陸費墀

瑤石山人稿序

嘉隆之際黎惟敬在祕書以著作供奉稱上意公卿憐才者往往推轂惟敬漢儒待詔金馬門持論白虎觀不是過也時與歷下東吳興國長興銅梁新蔡赫然號海內才士而惟敬晚交不佞在諸君子去國之後惟敬請老以歸話別三山余曾序其詩鎮江鍾太守刻焉大都謂惟敬與諸君子章昭代風雅之盛惟敬覽之報書曰往文徵仲以集相託也今尚負之異時全集序在吾子

乎惟敬下世長公君華以吏部郎出叅江藩梓瑤石先生集復屬以序且曰先大夫之意也余卒業焉先生品流書畫徵仲之後一人耳乃問學文詩徵仲何可望焉先生少有異質過目成誦其父侍御公愛之甚學士黃才伯以文名雄宇內見先生奇之先生遂及其門無書不讀後詣公車優游中祕與諸君子倡和無虛日金匱石室之藏寒士未見者先生得以游目深山窮谷之碑達人未窺者先生取以賞心故駿發而機應覃思而意

弘應制之作敏速若注射而骖駝有體書記之文蒼古
若鼎彝而朗暢易曉賦不衍而麗子淵太冲之遺也古
詩不雕而藻子建景陽之遺也歌行恢張而潤達夫嘉
州之遺也七律冲澹而遠應物隨州之遺也五言清而
逸排律整而潔浩然佳期之遺也菰林得先生猶麟羽
有龍鳳音樂有琴笙矣瓊山博奧鐵橋高古皆南海之
奇也黃才伯與先生起而承之受授一道得其精華黃
若大河而先生則砥柱之高峻也黃若長江而先生則

中冷之清絕也至廉介易親孝友好施粵中後起之士
皆先生倡之即茲編也天壤俱敝安知後世不有相知
定先生之言者乎不佞辱彥昇筆劄之託抱伯牙絕絃
之感因道其概焉君華博雅好脩有父風萬厯戊子秋
日五岳山人沔陳文燭王叔序

欽定四庫全書

瑶石山人稿卷一

明 黎民表 撰

賦

粵王臺賦

白露既零玄霜始積草木凋傷山川閔寂感京臺之忘
歸登城睥睨而中惕慨然增思拊膺太息興國忘王累轍
重迹豈徒咎陶之不祀爽鳩之弗宅而已哉則有强秦

定霸勁越守偏五軍摧而弗利睢祿却而生捐囂死南海佗據龍川占王氣於東井規閔位於瀛壖於是思華風陋黷結哀秦餘役徒帛乘黃屋以稱雄改金墉而創制日不重明世無兩帝思首丘於故墟挫雄心於遊說循南面之儀講郊宮之禮恢夕室以重摹擬郎臺而增絳堙竇夷山審曲面勢輦道雲連重軒霞起頽壤密石之工井幹榮楯之麗鉛墀鈿闥之華藻枕雕梁之侈固已窮殫海陸而炳煥萬里且其躋攀縹緲曠望芊綿橫

桐象郡却頻龍編控以虎頭之阻隍以鮫人之淵迭金
樞於窮髮散若木於虞泉淒風而纖埃不起赫暑則紉
筮常捐信可以紆煩理滯而樂死忘年徒想其初春始
秋宮車以出佩玉璽與丹符載琯輿及寶瑟靡旃如虹
樹羽若日彈飛繳生掩羣射疾組練赧乎天庭金石殷
乎地室欵塞洽鯁海之封舉醕霑狼籍之秩靈曜既西
歡燕乃畢目瞋心愉志驕氣溢謂劉項可與竝驅曾蕭
曹何足為匹雖麋伏於羈縻終兕決於受紮呂雉啣則

閉關反距代龍興則奉書要質道之汙隆惟其順逆施
及三主溘焉遂衰嬰齊入侍嫪女來歸乾侯萌於鸛鵒
驪戎興於龍聚終軍受冠纓而畫策揚僕汎樓船而出
師三關席捲駟介交馳石門為櫓槍之壘貪泉為雁鷺
之池烟焰焚其城郭棟柱鬱其傾敝茫茫畛域戒馬生
之雖有白壁紫貝之珍翠羽明珠之賄雕題黑齒之酋
駱越蒼梧之徒曾何益於摧敗哉嗟乎乘時者先奮守
險者莫當龍洲非表裏之地鵬溟豈百二之鄉卜洛者

處其中入關者搯其吭彼宴安於江介夫安取乎允長
然而竊國者百祀稱制者五王豈不以藩籬足以自衛
琛賫可以爭強使呂嘉悔禍而內屬南武裂地而分疆
安知不與卯金乎競爽而自底於滅亡雖天運之匪忱
亦人謀之不臧諒覆車之當戒奚高臺之怵傷哉廼振
策而去曳屣歌商以舒鬱結之腸歌曰春風起兮春草
生春草歇兮秋露零英雄去兮山川在羅紃盡兮臺沼
平天時有代謝人理易虧盈林光迄已毀栢梁又行傾

彼蠻觸之戰鬪兮安能使余思之怛怛

釋志賦

余遭辰之連蹇兮志菀結而不平獨超舉以遠游兮困
敦之歲余北征越谿谷之嶰岩兮汎皇流之淩兢既廓
處而去親昵兮又羈旅而無友生雖人情之同於懷土
兮獨余衷之蘊蒸溘大火之將徂兮鵲鳩感秋而先鳴
情憺憺而不釋兮心搖搖如懸旌夜漫漫而難寐兮神
靈靈而外憑衆既莫可與為語兮吾將假臆而自明覽

先民之所蹈兮咸先迂而後拔豈所遇之多艱兮抑天
道之遐昧說胥靡以徵夢兮尚鼓刀而感璜仲伏檻以
就繫兮戚扣角而歌商申重繭以存楚兮睢拉脅而危
穰秦揣摩而多金兮斯游成而被刑曰趨舍之殊域兮
亦倚伏之異門夫孰瞻智以顯榮兮夫孰幽闇而蒙患
彼焦明翔於寥廓兮鷄乃決榆枋而翩翩應龍驤首以
遊霧兮澤蜺迺樂乎泥蟠余豈不能慎棲而擇木兮心
竊有以自安也始余撫菑落以充幃兮恐叢蒸之蕪穢

裊懸黎以結佩兮又恐襲魚目而同匱冠雲纓之崑崙
兮彩霓衣之纚纚抑蛾眉而不揚兮矧敢呈其皓齒謂
予情其不信修以好姱兮要九靈以為質靈氛揆余之
貞素兮索蔓茅為余叶妃曰女無佞媚以自喜兮持諒
直其後無悔練元辰以儆裝兮詔鸞皇為之先羌中道
而竚昭兮傷成言之數愆心忉忉其佗條兮非蹉跎而
不行捐修玦以陳詞兮涕浪浪而霑裳覽衆芳其猶未
艾兮何直為此皇皇也俟河清之未極兮恐玄夜之降

霜宿莽瘳以日萎兮草木蕭瑟而焜黃余固知鑿枘之
鉏鋤兮精專專而不能忘睇靈瑣以排側兮邪氣壯而
內攻世方啞喋以競進兮何獨守困窮也抱龜玉而自
銜兮又士之覬行也退脩吾之初服兮思徘徊乎故宇
被荷裯之容裔兮蔭桂旗而輕舉予誠不能變心而易
累兮又豈貪婁而妄食諒不仇於今之人兮又何裒此
休惕撫年歲其猶未暮兮及余行之不迷肆墳索以自
娛兮獵道德以忘疲企泰階之一平兮願戢翼而俟時

雖離違之可念兮又安用坎廩而長悲亂曰結精遠遊
獨戰羈兮覽古鏡則悵多違兮抑志忍尤自保持兮淪
神道域其庶幾兮

雙節賦

諄高梁之淑媛兮秉亮節而不移蘊貞專之奇志兮懷
婉孌之殊姿襲綺縞之繽紛兮佩瑤琨之陸離申蘭茝
以充幃兮曳明月以為綦賁盛時之嬖媚兮潛幽宮以
自持俟鸞鳳之成言兮假惠風而鴻儀奉嬪則于高族

兮荷樛木之蕤綏兮珪璋之兩美兮倡墳簾而同氣既
齊體而委身兮諒何嫌於葑菲胡賦命之峴巖兮又天
路之遐昧曰之死而靡他兮謇中道而遂改無松柏之
峻茂兮同英芝之頻瘁悲伉儷之兩絕兮倏形響之捐
背世渙忍而溷濁兮余獨好修之為害也援蒼天以為
正兮指皎日而申戒雖謠詠之詈予兮甘餐茶而不悔
旦余依乎懷帳兮夕余息于玄房屏藻飭之金翠兮捐
被服之華章申絰組以重結兮垂簷帷而蔽光琴瑟弛

而弗御兮薜澤絕而不揚何四節之疚心兮春與秋其
迴薄覽蕙若之曾敷兮淹梧楸之先落號失羣之羈雌
兮淚單棲之別鶴霜霏霏而集楹兮露泫泫而飄幕庭
窳窳而無人兮眇余生之何託神恍恍而若亡兮冀音
徽之有覲忽頽思而就枕兮晤話言之猶昔起攝帶以
周流兮悵然疑而陴側孰微衷之可忖兮涕霑襟之汎
瀾豈同穴之悠期兮將闕地之為難碩遺孤之呱呱兮
增纏綿而永歎聊屈心而忍志兮鏡女史而鑪情憫伯

姬之待燔兮悼桓嬖之毀形嘉紀季之存祀兮惘杞妻
之頽城憤禮宗之絕命兮師班惠之揚名雖操行之不
同兮咸保已而全貞苟余心之無媿兮何必汶汶而捐
生嗟庇宗之為大兮竊致余之精誠潔俎豆於肸蠭兮
植枌梓於園塋訓恭儉以貽則兮俟黃河之一清諒天
鑒之匪遐兮終勒駿而騰聲重曰從一而終女之操兮
婉彼淑媛惟義蹈兮閨沕幽翳垂雨睢兮潔如圭璋莫
之缺兮矗如岷峨莫之折兮匪惟女儀實母則兮應像

作鏡貽相闕兮克昌厥後皇肇錫兮天之報施信靡忒兮

五言古詩

遊僊

我思忽不愜藐然隘中區凌山度瑤碣肅駕自雲衢遨
遊清都闕神姦吹我軀上帝垂藻旒羣后驂龍趨羨門
進僊藥王喬授玉書餐和鍊真魄精神遊六虛自握無
為寶年壽安足虞

濯足紫沂海晞髮朝陽阿雲車載玉女皓齒揚清歌參
差麗霄漢玉麟隱相和駕言憩玄圃貽我瓊樹華光儀
忽以逝茲意成蹉跎峇峇閬風岑汎汎蒙汜波仙才諒
非偶浩歎將如何

燭龍銜奔景倏忽歸崦嵫思託浮丘子高舉乘雲螭飄
飄弭絳節旖旎騷芝旗朝遊崑崙丘夕泳弱水湄竒齡
等金石桑榆安足悲夸父為鄧林但為俗所嗤

山林非所託所思在神州寓目八紘外經過華池幽神

光颯然至青鳥從我遊靈妃奉玉觴清謠自相酬歡娛
未終夕曜靈不可留山川曼綿邈白雲良悠悠安得不
死藥千載復來求

長鯨鼓玄濤巨鼇戴崇巘若華散餘暉照耀金銀殿流
鈴韵空歌瓊蕤倏如霰飄飄一水間霞蹤杳難見顏齡
不可駐流景疾蜚電喟彼蓬萊舟傷哉栢梁宴誰能迴
日車常令鬢不變

淮南方好術矯志棲雲間金鉞汲素綆寶鼎合神丹神

丹資服食白日生飛翰永隨八公去翱翔戲天端志大
術良疎功成慮亦殫連蜷叢桂樹翩翩留空山徒聞脫
屣去不見乘鸞還

詠懷

佳人入我夢華容渥如丹玉璫稱姣服揚辭吐馨蘭接
歡在須臾寤言阻河山坐惜朱華改空悲蕙草寒別離
不可處况乃玄律殫

肅肅高天鴻冥飛慕儔侶豈無凝寒思連翩自容與眷

金定四庫全書
卷一
我平生懷梯航限河渚塊然守空堂伊人自豪舉攬桂
聊淹留折麻空延佇道遠多風霜歲晏多思慮光儀恒
不忘何異渴瓊樹

邯鄲才人嫁為廝養卒婦

淹淚辭玉堦含悽下瑤殿今日歎離居夙昔歡同輦蘭
蕙自有芳蘿蕪固所賤浙浙西北風吹我秋田蓬夜夢
邯鄲路不識邯鄲宮玉顏會銷歇君恩那得終

出郭十里望白雲

伊余霞外心夙協滄洲想芳春戒簪朋青谿肅徂雨瀾
瀾清露漙英英白雲上旭日熹陽厓暄風散林莽棧道
既縈紆窺川亦沆瀣干呂氣多竒建木影殊狀涉雲脰
已捐覽勝心逾壯玄圃非冥設丹丘豈外象願矯凌風
翰永恣山泉賞

僧歸亭故址望棲霞寺臨觀黃太史精舍

青丘未云陟磴道方遄迴烟霞迹以愴誰見化人開雕
甍翼雲外玄構隱巖隈中有蘊真士雅負凌雲才汲古

浩津梁蓄寶富玫瑰奇文蘆七略玄象正三階薄遊沂
水服屢舉河朔杯緇塵一以隔歲月緬悠哉空餘雲臥
地蕭颯松風來有懷諒難已願假征鴻裁

登白雲最高頂

靈嶽奠南隩鳳翼矯而跼上千燭斗樞下盤絕地理脩
阪饒希苓迴蹊陰梗梓東觀極扶木西窺逼濛汜晨標
頽霞截夜氣白虹起玉樹發蔥青金潭耿清泚平生信
經奇茲山擅巨美圖史謾莫傳倜儻固難紀倘驂飛龍

遊長揖當途子

入白雲寺酌九泉

頓足雲外遊弭服雲中宇
晨霞朗高木晴暉射孤嶼
冷山漱瓊湛湛觴浮羽
層欄蝕金碧古瓦竄鼯鼠
撫迹泯空有忘懷契賓主
手揭留萋贈目送飛鴻舉
方諧鸞鶴蹤遽協濠梁矩
齊物在斯辰憂生非遠慮

溯水簾洞過月溪寺

緣蹊路方澁尋異景屢延疑
思矚幽巖朗詠溯長川青

蓮敞妙界璧月鑒華泉寶樹無重影金輪不復圓依微
想臺榭出沒悵雲烟羽人絕髣髴員嶠徒空筌歸寂竟
何感撫化彌泫然六龍倘可頓為我揮虞淵

鶴舒臺是安期上昇處

安期鍊玉液飛步凌紫霄空餘璇臺在千古鬱岵堯金
牀鎖靈穴碧樹敷英翹鸞笙空縹緲鶴馭徒逍遙物化
迹逾勝理愜境自超願弭雲中駕隨君揮碧寥

虎頭巖

松徑光未黯賞心詎云釋攬勝陟崇崖褰衣履危石雲
構方蒙茸乳竇正淅瀝險逾呂梁壑嶰異天井壁仰接
驚猱棲俯視飛鳥迹綠帙晝常扃丹光夜逾艷杳杳曛
烟生濛濛冬霰積功非夸娥掉奇假巨靈擘棲真事岩
耕倩爾飛鳧舄

送何于遜遊衡嶽

朱陵鬱佳麗真氣雄哉紛華芝翳鳳蓋空香飄鶴羣羽
衣何婀娜行逢魏元君手掇金明草口誦青苔文玄言

屢敷析刀圭時見分茲輪香難即迴身入青雲流鈴歌
未歇陵茗尚氤氲倘揖當途子相期凌紫氛

神臯鍾火德名嶽奠坤維豈伊潛霍儔聰明諒在茲登
封表崇壝肅事展靈祇歆厓結衡宇迴阿蔭桂旗卿雲
出鈎闕郎月流瑣扉玉童夜擊鼓祠官朝祝釐觸石散
膏壤生賢翊昌期理冥信莫測跡賁良可窺蹇余俗士
駕何時驂赤螭晨登岫嶠岑曠望彌赤縣垌服引昭丘
襟帶窮楚甸五峰鬱遊龍三湘皎澄練礪砢矯以虔雲

霞藹而變尚想盧敖遊應茂海若見尚子願終畢伯昏
險可踐夙昔經竒心茲焉慰遐睠

如皇昔導江翻然感玄夷竒文鏤金簡天矯鸞鳳披靈
蹤閔草莽神功播無涯彼美昌黎子千秋乃來儀精誠
迪窮昊白日廻陰霏鑱厓紀大雅逸韻凌雲飛欽聖有
逸軌懷賢注遙思慎矣涉脩路跂爾瓊樹枝

送何喬仲赴闕

招搖有桂樹結根南海湄蒙龍度霜霰皎潔常不移以

金史卷之八
本一
茲孤直性貢之白玉墀春風被蘭茝榮耀同一時雖有
艷陽質比君璫樹枝明堂備榱桷海寓瞻巍巍丹青洵
云美玄素豈所睽無言媿桃李幸得仰容輝

託養貢丘園深衷媚泉石乘流縱歸榜登山望飛翼揮
觴欣與同嘯咏忘昕夕詎云雲雨乖悵彼山川隔忘言
昔所歆投分貴不易龍蠖自有時誰能效沮溺

驅車燕趙郊道由介丘陽飄風起蓬蘢陵谷晦蒼蒼津
梁浩千古誰能測幽冥我猶局一隅子今營四方翻飛

無勁翻蹇步愧同行安得皎日惠願言希末光

羽檄起邊庭夜火沉秋柝六月猶出師連營亘沙漠雖
收瀚海功未極西山瘳丈夫徇國心安能處其薄努力
宣令猷康屯運奇略御雲覩輪囷欖槍見清廓馬多却
走餘民有康衢樂王道喜清夷書生守藜藿

園居雜興

時雨滌芳園林臯薄暄煥微風捎池荷輕雲蔭修竹懷
人倦寢興褰裳展遊矚魚出深淵蜚鴻漸高木云胡

限惟賞跬步成川陸琴心亂無緒樵歌斷復續緬彼濠
上遊悵望清溪曲卜築倘有期從君莢松竹

冲懷寄林壑抱疴臥園廬詩書為我縛一畝成丘墟清
晨具農笠命僕勤負鋤新畦灌靈藥舊埕環嘉蔬蘭生
既盈畝豆熟亦滿車夜雨剪春韭清霜登紫萸朋來可
觴咏安用烹神魚食力古所貴巢林誠足娛寄謝任公
子持綸安所如

晨起齋中讀書

息躬衡門下遊好在六經丘中列萬木風起皆金聲山
林有殊觀耳目無遠營清晨屏荒翳躑躅當前楹鳥耕
思有歲熊經希養生遊心極罔象頓足遊大庭曠士恒
抱朴宵人若懷永或偶蘇門嘯蹔返南陽耕龍蠖本殊
性鷦鷯豈諧征茲樂庶不忘炯然垂丹青

辭家適燕薊遙遙遠行遊悵茲雲雨隔忽復寒暑適人
生寓瀛海安用懷百憂伊余困泥滓有志仍丹丘臨淵
非釣國巢林殊鑿坏奔波翼迴舳駭路遙旋輶濠梁有

逸矩箕頤多清流仙夫杳難覲
美女徒好修去矣從所欲
軒蓋誠多尤

懷友詩

急景馳西汜悲風起寒陸
眷言心所思緬邈林塘曲
芙蓉為君衣薜荔為君屋
山巔思采苓雲中乃抱犢
我欲往從之道路阻且復
宴坐恒屢遷寤言復在目
衾裯詎同御椒蘭徒盈握
歲晚當歸來從君藝松竹

送鄺中伯北上

扶南有奇士雅志無與儔班荆翳環堵被褐臥林丘手
撮青琅玕引領睇神州美人馳目成逝將遠行遊閭闔
啓鴻運纓弁宣靈猷舍我蓬門衣披君紫綺裘挈壺有
餘智揮刃無全牛軒車豈云晚邪逕安足留居人易生
思客子常苦憂跼涉要路知余懷阻修

征車何皇皇念子如駢服嚴霜被中野大氣淒以肅我
守衡門雌子騁高衢足望望登君門悠悠漸平陸獻賦
爭光輝夾轂相馳逐朝同樓護遊暮就主父宿時俗徇

異同明月襲魚目去矣慎所投慰我忘邁軸

同丁戊山人遊白雲寺

流觀遍炎隲結賞自員嶠積陽熙層崖凝陰豁林杪雲
構何厓屨乳竇自窈窕瀕洞出谷雲淵渟瑩神沼稍疲
暫憩石選勝益躋表欄楯寄躡踞軒窻瞰深窅猛簾發
鴻音寶輪晃餘照龕以曇花覆堦將慧草繞詎謂劫灰
餘遂成夷原燎棟撓芝菌生瓦圻鼪鼯嘯金薤剥石幢
求藥遺丹銚惠遠豈復招巫陽不可叫蕭晨命良儔蘭

觴展奇眺感茲玄運徂念爾冲規劭關河閱舟楫雲雨
乖言笑潜蚪媚煙霄冥鴻避矰繳勉敦谷口盟無貽北
山誚

二忠祠

二忠者副使陶公晟方伯陶公魯也父死節于
浙子建功于廣有司以事聞今兩省並祠焉

矯矯忠烈公英謀本天基不謂錦繡腸乃佇干將器奮
力當休明朱戴始一試讞獄清單辭觸邪懾文吏陳臬

正統初皇輿偶中潰寇阻括蒼陽江介潛魑魅帷幕已
拊髀詩書更謀帥公已深許國揮劍沒長萼連營赫組
練中堅擁旂旋受降已蟻附來蘇乃磨至詎意下齊功
更阻平吳志乘危出遠道孤軍陷死地可惜溫序亡竟
踵睢陽事委巷有啜泣壯士愈決背精誠感天闕廟食
蘭湯涖巨榜經蛟龍穹碑負巔負哲嗣播清塵鴻私永
敦貢良史應持書終古垂幽懿

方伯本慶源婉先樹勲烈騰驤在萬里早已見汗血剖

符古岡州遇事輒勇決冠弁日岌岌珪璋遽昭晰授鉞
典名藩賜履徧海溼溟浸殲鯨鯢硎房掃槎枿舞千服
三苗回面靖百粵玉麟錫紛綸銅柱表巍峩石建蓋恭
謹馮異功不說幽討從江門從容榜蘭枻憫溺吊厓山
蹈海憤始深左轄應未酬台階遂中折殊勲載盟府芳
猷被邦耄念功今神堯崇祠再昭揭秋風汗馬趨夜月
臯禽唳金貂綴惠文千秋見臣節

巫山高

巫山高不極遠望何芊芊靈林構鬱律神宇閼冲玄曳
雲翳白日興雨蒙層巔平瞻景夷館俯瞰雲夢田芳春
展遊豫弭節此山前精靈爾何感魂夢屢徂遷晨鷄奏
天色環珮聲鏘然空山曠延佇掩涕方來旋人神道終
異歡愛難久延荒淫古有戒茲樂誠已偏惟有高唐賦
千載凌雲烟

擬庭前有奇樹

嘉樹媚朝陽枝葉正相當佳人御紈素攀條翫其芳眷

彼從征人思心共飛揚昔期別三載今已歷九霜繁華
悅朝茂榮耀難久常願折三春榦一寄龍城傍不惜軒
車晚所畏道路長商聲感鷓鴣日暮愁紅粧

社中分詠要離

勾吳素趨悍頗聞俠烈風吐哉要離子乃為萬夫雄怯
弱衆所咤伍胥明其忠鋒刃讎所愛草芥捐微躬持茅
執幾殆入水術當窮奈何殞強敵天幸成此功求名固
已謬輕生誠鮮終乘舟媿范蠡首丘感梁鴻腐骨已蔓

草英氣猶長虹惟有興亡迹千秋悲角東

虞翻宅

城西有名刹云是仲翔園烟蘿日以翳堂隍無復存幽
林集異鳥曲沼羅芳蓀諫獵想奇節醉酒悼微愆懷瑜
爾何罪捐珥誠少恩才情豈不劭骨相故多屯瘴鄉有
逆旅江介滯遊魂抱獨縈遐感談經思偉言運銷名詎
滅身屈道彌尊惟有青蠅歎千秋傷隱淪

天全所為大司馬鐵橋黃公作

西郭佳遨遊芳園萃森爽脩竹暎滄池潛虬動滉朗青

泛

軒名

何蜿蜒降池肅間敞遊神無近營寓目發遐想彼

美賁丘園振纓遂遵養冥飛遠矰繳乘風適蒼莽若鳳
感先民為犧嘆哲匠喀爾非喪吾超然得神王景行屬
曠筵疏材荷甄獎豈伊平原懽况逾竹林賞願附扶搖
翰從容撰几杖

粵洲玩梅亭得世字

翠嶼屯朝霞青蹊屏氛翳藻構鬱岩亭青陽脩開霽萬

物正芸芸見此孤根麗疎影帶欄楹寒花遠庭砌點素
煥星懸凝英爛珠綴入室擬幽蘭留人比叢桂零芳慰
幽獨懷玉期貞勵遊目悟先幾忘言獲真諦一謝塵滓
遊逍遙人間世

玉虹澗得日字

碧溜疏遙岑瑤光瀉晴日束石乍縈迴銜厓轉泌潏清
聲散筍籟靜聽調琴瑟分流雖究萬汭始乃歸一幽討
訊真源汲古懷脩緇習坎浩自盈到海功始畢

贈陳詔州

韶石款南岳肆水滙東溟巖鎮俟良牧疲人紆聖情推
轂允明茂之子揚德聲豹變蔚文采鳳儀叶咸英淵冲
恒若谷溫裕式如珣淮陽本卧治華陰更傳經匪惟惇
化穆實以心源清三年報邦政萬里尊遐征衡茅惠高
蓋疲荅媿逢迎雲螭不可弭鳬藻馳我誠所冀隆弘美
王道今休明

送丁戊山人遊羅浮

遠遊豈不羨逼此區中情願得鴻鸞翮乘之以遐征詰
朝飾羽蓋嬉遊至層城陰室啟耀真陽宮豁朱明俯盼
列川岳仰視燦日星朝攀瓊樹枝夕采瑤草榮外觀豈
足慕所貴能遺形紆爾瀟瀟懷馳我鳬藻誠臨風不得
並望美空屏營

瑤臺峙十仞丹霞蔽朝陽上有青琅玕下有孤鳳凰來
自君子國五色綯采章所咏非腥腐所營非稻粱我願
偕此鳥邈彼靈風翔一舉軼宕冥再舉周園方崑丘羅

碧樹青岑漱瑶漿路遠竟莫致苞羽空摧藏翻飛諒有
待何必內懷傷

雙節為內江蕭氏作

華萼何相輝蘭荃競為美婉孌當青陽賡懽侍君子翻
飛豈獨翔遊行必俱止成言逾金石伉義期桑梓良願
既我從銜恩自茲始

白壁無緇磷提身自孤潔分形本同株殉生豈殊轍鉛
姿逐泪毀絲音隨絃歇逝水寧迴流芳蕤不重結長夜

何漫漫一往成乖別

淒風起雲屋夕景下玄墀徘徊別鶴慕啁晰離鵲悲陵
茗奪幽色堦草含碧滋芳年屢迴換單居幾何時感物
增悽惻羽觴難復持

境樂心逾悲年殊志還戚惇惇撫嬰孺依依感疇昔紅
芳成皓首汭光信馳隙忘憂豈護草可卷誠匪席不見
青陵臺上有雙棲

芳草詎云蝕高誼良有終懷清表秦里石窳當齊封感

念臯魚子精誠迴昊穹圖形畫帟瞿負榜纏蛟龍從此
岷峨下千秋傳衛恭

題仲弟惟和雲野山房

白雲何燦積飛度玉山岑散漫南窻下徘徊嘉樹林凝
霏入素几委潤夾幽襟翹首帝鄉遠攬結興長吟釋耒
起南畝膚寸待成霖卷舒在適性去來爾何心扶搖方
整駕總轡瑤池陰

天寧寺

僧道衍故居

穹標千朱鳥宮鎮峙黃甸迢遞屢劫餘曠望千里見威
神翊棟宇丹梯凌棧鬱隋荒戒不遠秦餘迹可踐宇內
騁良圖異人側延盼混迹漁樵流中備帷幙選叱咤興
風雲指麾定京縣豈徒人謀勝寔以覺力顯曩基有增
飾故池仍重穿金骨永不焚智燈夜猶炫弓劍歸鼎湖
丹書閱淨院古瓦蒼鼠竄寒林夕鳥嘯玄運有興衰浮
生信露電迷川藉津航塵海孰漂轉窮途創奇觀臨風
淚如霰

白雲觀

翠壁苔蘚剝雕楹風雨傾不見赤蚪返空聞白雲名環
中龍虎伏鼎內鉛汞爭石函委真蛻絳氣干天庭松杉
緬延佇鸞鷟導遐征古梵汲寒冽陰廊畫仙靈羽流萃
雜沓鬼火流青熒腥膻漫玉椀瓦礫飄金莖雲螭杳難
駕霞蹤愴余情修途逼暮景改轍思長生稽首受玄籙
一為開瑤局未敢望鄴鄴庶能守中庚諦聽獲憂憫恍
惚聆簫笙出門悲風起曠若失蓬瀛何時復來遊相隨

欽定四庫全書

朝玉京

瑶石山人稿
卷一

瑶石山人稿卷一

欽定四庫全書

瑤石山人稿卷二

明 黎民表 撰

五言古詩

和陶徵君飲酒

僕自垂髫操翰涉于強仕之年六上京師迄于
空返蹇劣之效斯已彰矣甲寅歲言歸故山始
營隱居之所暇日覽陶靖節集有飲酒詩二十

首輒依其韻為之意率詞俚取諸胸臆觀者幸
畧其辭而原其心焉

天路何遼廓吾生從所之致身苦不早奄忽非少時迷
途幸非遠回駕方自茲但當飲美酒任性勿復疑有客
款蓬廬一觴欣共持

禽慶遊五岳仲長之卬山鵬鷁各有適大小安足言委
運屬壯齒建功慙暮年所貴能遺形豈願竹帛傳

義唐去世久緬然傷吾情營營當途子所徇利與名喬

松歷千載蜉蝣無久生念此修短殊徒令心骨驚有酒
且斟酌驅馳竟何成

有鳥具五色乘雲以翻飛毛羽何摧頽日夜鳴聲悲竹
花久不實饑寒無所依高松生南嶽歲晏當來歸仲尼
欲浮海楚狂譏德衰戢翼守寒賤無令茲願違

高臺架林麓眺聽忘俗喧頗愜曠士懷孰謂茲遊偏輕
烟起平陸夕陽頽西山衆鳥赴喬林吾亦念歸旋無悶
徵在昔銘骨事此言

愴然感昨非方知今為是白壁混青蠅荆玉遭讒毀田
疆困二桃論功固當爾弋人亦何為吾將尋園綺

秋風被庭綠粲然摧孤英變化每如此底用惜其情開
軒盼流景倏忽西南傾携壺就花間有鳥向我鳴茲懽
信可畢擾擾勞吾生

翩翩繁華子灼灼桃李姿桃李雖不言霜風摧其枝榮
期老帶索李廣逢數奇坎壈良足念天命不可為安步
聊復爾詎用乘金羈

衡門晝常閉好客每為開
謂我當遠遊故居不可懷
明當偕子行永與人徒乖
遊必崑華期止當廬霍樓
應龍志天飛胡為樂蟠泥
感君吐中腸素心固所諧
蹇裳自茲去徑路了不迷
逍遙無何鄉十年方來回

我昔遊燕趙覽古登城隅
回風振槁葉雨雪泥中塗
慘戚遊子顏歲晏坐馳驅
謀生一何拙衣襦豈無餘
便當舍此去息影窮山居

依依辭密親悠悠涉長道
十上竟無成迴車念將老

希恢令猷豈在憂枯槁冉冉玄運徂顏色無常好彭殤
等歸盡金玉焉能寶吾將謝世人抗情烟蘿表

吾年已強仕非復少壯時都無懷祿心尚耽古文辭其
人雖已遠玄解或在茲欣與二三子披襟瑩前疑忘言
誠未易莊惠不吾欺遵途有逸軌逍遙隨所之

桑麻翳蓬門蕭然斷人境欣無耳目營既醉還復醒知
我誠已希茲言貴深領高矩謝夷齊清風挹箕賴天運
固有常得喪吾當炳

晦朔相環周良辰已復至開軒候良朋一斗徑先醉衣
帶乘不理杯盤亂無次龍蠖自有時人豈能賤貴但願
餽其醕獨醒豈知味

炎洲負南海中有神仙宅我欲從之遊蒼烟杳無迹人
生若驚電年壽豈踰百玄夜忽幾何晨曦將復白霞舉
倘可期脫屣非所惜

子雲不曉事白首窺玄經我昔弄柔翰竊祿翼其成豈
謂茲道非年齒已屢更顧影守空堂枳棘塞中庭靈芝

尚三秀鸞驚待一鳴賴此慰遲暮可齊達者情

芳蘭雜蕭艾頽俗散淳風咄嗟可奈何有酒時一中噤
吟笑唐舉幽憂憐敬通真妄詎能辨荆人遺其弓

世人營丹砂繫影無所得夸父為鄧林古來共稱惑頽
波赴沃焦坏土安能塞願言乘虛舟往就不死國玄珠
雖難求獲之在幽默

邠生長免歸於陵不求仕古之賢達士得失徇諸已念
此媿平生屢進忘其恥不能守田廬胡為去鄉里雖云

營斗儲力不任網紀周任有遺訓吾行固當止薜華不
終朝達生或可恃

余生素屯蹇頗復懷清真謬當盛明日再覩玄化淳人
文固昭晰憲章亦已新豈起東蹈海會將西入秦征途
不遑舍所逐埃與塵為策雖不就斯志良已勤奈何四
海內棄絕寡所親竭來二十載皇皇尚迷津念之動中
衷涕淚沾衣巾置此勿復言齊契在古人

吳中三子詩

文水濬靈源信國挺華胄才本埒機雲論豈殊向秀好
客屢清言深衷轡携手壤林委丘壑長纓困馳驟曩聆
古劍篇森羅燦星宿烽起吳江濱驟珠不可覲

右文休承

彭公隱吳市坦蕩無俗氛雄書邁魯國善誅比揚雲光
彩戰鸞翮圓方摩鵠羣沉飲知杜機萬物從芸芸晤言
杳闕河夢寐懷清芬何時覲璫樹良用慰悵慙

右彭孔加

周郎出江左朗朗散風標六籍漱芳液羣玉方采樵
磬折見冲抱款言彌久要愴然念離夜携手在河橋
緬余枵散姿謬倚英瓊瑤回望具區雲心旌屢搖搖

右周公瑕

遊雲谷山

朝從雲中遊暮投雲中宿烟嵐稍出沒岡巒相迤屬
層標下奔峭雙竇驚騰騰瀑朗月沉東峰殘暉在林木
迢迢浮雲征寥寥天宇肅攬衣不遑寐良夜欣秉燭動
極歸

有靜吾以觀其復天鷄奏晨曦杖藜騁遐矚

大科峰望日出

炎洲孕靈秀海灣潛異蹤躋攀極巖險始窮七十峰却
倚何睢盱競秀皆冲融駕肩朝羣帝蜿蜒伏騰飛龍一氣
混溟渤萬有開鴻濛驟陟憂鬢髮凝眄披心胸石菌不
可拾金沙或能逢終營菟裘居賞心冀來同

謁白沙先生祠

玉臺昔飛遯名山屢登踐泉壑閱霞蹤垣宮飾嘉薦兩

楹委林麓四壁帶苔蘚斂形隨化逝神理將無變深衷
懷若人山阿或遊衍淵機涵飛泳帝牖滅聞見執鞭予
已後升堂迹方添茫然空所思浮雲沒遙巘

天湖亭

湖水何悠悠鯉魴何蓁蓁臨川無芳餌嘆息將奚為昔
人思釣國凌霞構重基風雲有消歇池館遂堙夷我行
偶見此躑躅心為悲曠士懷鵲起霞舉當有期不能啞
蘋藻泛泛隨鳬鷺

軒轅試劍石

羅浮襟詠

仙翁本劍俠遊戲龍衮前金盤射白鵲鶴髮換童年幻
化乃能爾金石亮非堅神化終騰躍洪鑪空燄烟

通天宮

鬱羅隱蕭臺瓊扉不可扣耿耿閱幽仄迢迢歷星宿道
逢茲輪客倏與青精覲相携毓華林行歌采三秀

飛雲頂

龜臺何岵嶢下臨西極天靈妃舞雲輶嬉遊携列仙鯨

波忽簸蕩浮來知幾年至今三青鳥猶巢珠樹顛

鳳凰谷

翩翩五色鳥乘雲自丹穴覽輝十仞岡弄影寒潭潔飲
咏豈不謀腥腐非所屑虞羅爾何施清冷坐怡悅

野人廬

黃野仙已去於菟守靈關松風起萬壑時復乘鸞還朗
吟梅花句清麗非人間被衣出礪戶朗月沉空山

單道開石室

至人鍊真形冬夏常穴處細石伴瓊飴饑來自堪煮萬
形等歸盡逍遙斂神去香火遺嵌岩霞蹤杳何許

中閣為陳公載賦

飛雲帶積阻磴道多莓苔旃檀駕高閣芳剎凌空開連
峰入戶牖金銀混蓬萊焱梯杳難即天仗從風迴閣中
餐霞子早隱蓮花臺神遊挾希有升降隨九垓蟻螻俯
濁世滄溟視浮杯金沙發五內足底興風雷笑入桃花
源浮光軼塵埃饒文記石壁千載方歸來

同文壽承李伯承郭次父梁思伯集馮大叅汝言

官舍

明月出西山餘輝偏城樓城隅多軒蓋秉燭為夜遊清
笳雜繁吹廓然銷人憂坐有白雲客高談比琳瑯意欲
躡倒景遊戲崑崙丘願我俗士駕安能驂雲蚪開尊且
命酌主拜賓復酬悄然嚴霜下褰裳不可留眷言茲夕
懽荆壁獲所投

歲暮懷梁園三子

瑤林挺荆楚吳公秀無雙鴻遠振英響鷄舌備周行沈
思運圓象補衮迴七襄猶龍不可繫歌鳳仍猖狂見客
屢白眼何人得升堂再召異宣室憔悴同浮湘宇宙豈
不廓斯人日摧藏梁園啜古淚蕭條灑烟霜寤言覲璫
樹怨彼河曲長

右吳明卿

蜀都寔才窟銅梁奮天步心源邁古濬氣岼流俗迂屢
遷宦不達四壁家仍窶虛舟爾何心蛾眉自生妬言念

河朔遊亟蒙班石頌款闕倒衣裳
胫篋見情愔夷門杳
何許勞人走霜露羊腸方險澁
鸞翮將焉驚憂來變鬢
髮良以思君故

右張肖甫

汝南重月評中郎冠時哲水鏡銓人倫
珪璋映朝列瑋
詞鑄心匠奇穎表天嶷將整扶搖翰
倒覽金銀闕抵掌
笑時流出走因婦舌遇我胸屢披
下士食為輟銅街驂
轡遊紫邏揮杯別懷材卧空谷
下乘爭馳蹠思君阻寒

水三花竟難折

右張助甫

五遊贈郭山人次甫

乘屨之勞山三神鬱相距羨門駕吞舟凌波載遊女投
珠赤水陽捐珮玄洲渚鱗裳雜星羅虬蓋隨雲舉寓目
溟淖觀揮手蜉蝣羽若士寧足矜三光可為侶

恒代秘珍符蓬蘽孕奇寶服食駐顏齡顏容美神媚息
影事窮棲散髮卧絕島止渴漱玄泉療饑掇神草三尸

去我身谷神自繇抱冥靈雖千秋不知我壽考

瑤枝列漲海若華散炎洲神魚運大壑巨浪排空浮雲
帆倏飄舉恍見軒轅丘鸞歌自往來羽客乘烟流自非
琴高侶誰能駕扁舟一息騁萬里鷗鵬安足儔

龍駟乘奔雷羲和不遑舍白露應秋零朱華隨年謝願
因慶雲興層城彌焱駕飄登閭風巔三辰伏其下金臺
異溫涼玉瑩閱冬夏便娟多列僊娛遊使心參

天壇冠玉屋神芝伏其陰永願排火粒掇食駐蓬心躡

僑三臺阻息駕伊川潯道逢王子喬笙竽吹鳳音攜手
紫房裏匿影青雲岑世人不可見三華徒碧林

送姚伯子還潤州舊隱

久作燕臺客幾經秋月白秋月復春花年年故園隔手
把嚴安書家儲無甌石却掃平津門垂翅長安陌昨夜
夢歸來五湖荷花開楊帆從此去要路不須媒北固青
山在長江流綠苔更尋江總宅相期中散杯浮雲爾何
物壯志空摧頽余亦乘扁舟雷平披草萊

十四夜月同姚元白歐楨伯作

客心睠良遊秋月有華照霏烟斂天末灝氣澄霞杪素
采雖未圓雲衢已光曜寗寐舍朱宮齎淪薄蘭沼周除
有近觀窮髮無遺瞭清暉雖可娛煩襟自縈繞坐俯蜻
蛸吟仰聆哀鴻叫關山限羈旅歲月苦奔峭褰裳暫徘徊
揮杯共清嘯朗鑒應可期留睂展遐眺

十五夜月

纖雲屏氛翳圓景光逾爛澄輝溢層霄晶瑩靄平旦下

見長安城金銀造天半甲第雜星羅雕甍蔚霞煥登臺
翼神姦清規彌可玩飛觴展良遊促坐命華琯沈冥我
思積負羈爾情惋朱華方葳蕤白露遽凌亂展轉長河
翻勞歌南山斡攬環誓相於居諸復何歎

十六夜月

盛滿不恒居馳暉已復歇輪囷尚皎鏡胸臆漸成玦氣
匠增蕭寥霜籟疑慘冽南樓俯岩壑闕山不可越徂年
值急景蜚姦凌暮節良晤復幾何登臨念乖別朱絲屢

促柱金罍豈徒設倚伏遽相尋榮賤同一轍且終今夕
娛冥心寄盈缺勞謙可久安珪璋俟明哲

秋日集文壽承諸子得寒字

翻翻雙飛鴻戢羽遊河干蹇予江海士託交青雲翰黃
華屆秋序蕭爽可遊盤驪然返纓弁聚此西掖坦長筵
列絲竹中厨具盤餐光華盛朝闕幽貞責林巒吐訊出
金石瀉文馥椒蘭潢汙非所貴明信良已殫片諾季布
重盈虛翟公歡隙末申烟戒相期保歲寒

贈大司馬蔡公移省留都

洪河俟舟楫大翼假扶搖明公值休朗弱齡見英標剖
符卧江海浪迹偕漁樵徒聞季布諾誰同貢公招竭來
蓬池嘯躡步凌丹霄秉珪入銅龍惠文綴金貂鴻恩翊
皇度具瞻肅羣寮姦容誰不企希音一何寥改服指舊
邦乘流命歸橈庶公思用趙長孺願在朝望隆位非薄
心邇迹豈遼永言樹勲伐慙慙慰楊苗

觀舞

曲房羅薦合華燭黼帷舒嘉賓出上國妙妓產名區合
懽垂綺帶連理綴羅襦霞起當瑤沓花生繞玉除粧成
遙掩月體迅欲凌虛赴節偏容與應歌目疾徐圖雲開
繡衩寫鳳曳長裾洛水驚鴻日吳城掩鶴餘凝情增盼
睵回態轉踟躕靜女思貽琯芳華欲攬袪挂纓君未諒
解珮持相於寄謝東隣子舍顰信不如

同王元美詠窪尊

昔賢寄沉冥遺迹表江岸列中若紙白青黃豈溝斷鼓

缶歌如澠瓠落恣汗漫鯨飲聊止戈蠶頭刺柔翰
惟勤小物庶用託遐觀盈虛有迭代壑舟乃廻換
形模尚輪囷銘識已蕪漫明牧展曠筵臨盼起淵
翫舉醕咸盡惟輟箸屢興嘆緬懷若旦暮偕遊等
鵬鷁幹棄何足傷
堅貞賴幽讚

雪後同許計部過崔都水

潞水背京邑薄書成陸沉况茲異鄉感復爾玄運侵疲
驂何所適曠望就前林大陸玄雲合蒼龍迥且深綢繆

賴君子芳訊吐中襟並坐蔭華棖醇酎時勸斟悲風振
積霰頽光喧寒禽豫樂愜時序延覽諧夙心去晷良足
念來懽猶可尋高冥徯六羽結桂山之陰

送蘇子川之金陵

弱植窘修途衰齡奮徒步愧匪璫璵姿遂令琬琰誤紫
閣崇造天銅龍闕朝暮邂逅逐驂鑣殷勤展情素桂枝
屢扳援葛藟相依附金門我滯迹烏衣子遵路方嗤泚
澌勞豈有纓緌慕秋草變芸黃客子踐霜露睽離屬思

淺中情不能慙

太霞洞為周象賢賦

增城奠西趾靈景潛金方儀璘列兩曜川岳備五藏冲
騰鬱劒氣竄窳舍朱光乘屨恣遠討劃然見金堂陽烏
翼我體丹霓為我裳仰掇毓華林俯吸瑤池漿形神永
超軼千秋常悅康始知中區外還有不死鄉玄鑰頓能
啟從君嬉紫房

別潘象安

郭郡潘子象安淮南李公之門生也象安能為
古文詞隱居黃山中李公延之閣下乃象安恬
愉不及世事客李公餘十年無所請猶蕭然布
衣也李公食必並席少別為之揮涕其見重如
此萬厯改元象安復以校藝至于京師有司不
見錄以大夫夫人年高亟請歸即當途欲邀致如
李公故事不能留也慨惟李公當朝守正不阿
以萋斐去國而象安亦淩落不偶不肖之再為

掌故也實出李公獎拔顧窮途暮齒無所建明
以酌知己之遇茲復與象安別能不悲哉然象
安尚翩翩壯夫也必能收澠池之效於其行也
詩以慰焉

紫閣崇造天劒佩聲相磨吐哺遘良宰招延奇士多伊
人奮下國被髮行燕歌願以朱絲繩鏘然間雲和千金
不受賞抱犢遵山阿流言點赤鳥推轂轉蹉跎手中青
琅玕幹棄同蓬科倚門俟舟楫旅服返江沱素交一以

盡行路起揮戈嚴霜下宿莽悲風增微波強食以自愛
啜泣將如何

予告出京師貽同好諸子四首

釋來趨闕庭潔身奉君子改服踐二京提榘餘十祀並
轡參羣龍衰賤難隸齒倦翮思林臯遊鱗羨江汜干沒
今有期離憂自茲始君門日九重行子在萬里豈無衣
與繻所念在桑梓攬蕙遵前途淚下不能止

東閣多奇士林風邁前聞而我斥鷃羽安能鳳凰羣招

延覲良宰翻飛荷明君攀援絕馬鄧論綴殊淵雲荏苒
經歲時思樹尺一勲駑鈍未及展驅策誠已勤行將反
初服沮溺同鋤耨撫已寔踰量所志慚食芹

雙鳬戲中沚羽翼相因依眷言二三子疇昔同裳衣嬾
婉未及終雲雨當乖離往嬰鵠原戚今懷機杼悲貞悔
難具卜榮賤同一時衆人各有營疇能恤其私君子重
明義申以皎日期采擷異葑菲以報瓊玖貽

揚旌出三河引領望雙闕飲餞傾路岐纓綬盡朝列婉

嬖貽贈章光輝奪明月上有慎脩塗下有過迴轍懿此
同心言念之五情熱昔如形與影今為環與玦朽鈍誠
已疲提携俟明哲

紆勝園為張元易賦

中條距芳甸丘壑亦未遠緬裒上世人於焉事嘉遁雲
螭不弭駕霞蹤尚可踐疏峯結綺構臨流杭珍館盱眙
託幽遐魚鳧樂暄暖乘流罄洄沿習坎悟舒卷金門不
可招佳期起深眷素苔雖未零朱華已堪蹇滯留豈不

惟歲月易婉婉願回苑洛轡丘中恣遊行

出京師貽同好

弱植乘嘉運蹇步備用行慶雲垂華渥草木共光榮提
槩分已溢改玉心彌貞德宣藉親交芳蘭間杜蘅雲雨
當乖析燕婉不及并蕭晨起嚴駕攬涕沾我纓緬然阻
川塗曠爾逝音形貞悔豈預期損益難具明弭怨即東
路含涕望西京陳詞託歸鳥以懃我中情

同陵州牧關文學遊小西天

陸海潛異珍奇觀在涿鹿積險希天門重深訝淵谷真人感下生神僧懼沉陸鑿空啓檀施鏤石藏梵牘委積彌年紀青苔尚可讀遙役詎能探飲河恒滿腹據槁日酣飲遠望蕩心目夕鳥東南馳庭臯千里綠寤寐所思人往來山之曲

登泰山作

神臯表東海作鎮何窮窿氣匠構萬有揮斤闢鴻濛顏然壓九野奔伏如遊龍飛梯倚立壁側足臨絕淙靈焱

生兩腋乃造玉女宮仰視但蒼莽欲往階何從平生汗
漫遊泠然感絕蹤海日連周觀悲風起秦松息影止岩
下搖心尚忡忡

畬李李常

衡門絕塵鞅慨然撫今昔良朋千里至末契等金石枉
駕追前蹤意愜從茲夕開襟出雕章往往叙離析蔬畦
漸堪剪濁酒聊共適鳴蟬歇高樹栖鳥投林隙為歡知
幾何流火忽復易感君平生言重逾連城壁

食荔枝貽李季常兼東歐經李歐子耕

火齊出南海累累蔭房櫛雖蒙側生誚移植甘泉中瓊漿一入口五内生冷風枳橘有常性氣味將無同君子幸見賞飽食寧傷中雖云悅顏色亦能熱丹宮密脾間清汲調燮乃見功神農疏草木爾雅詮魚蟲烹芼失其宜伐性茲無窮作詩貽北客細咽無匆匆

別李季常

擔簦越五嶺矯志仍丹丘攬桂凌石室晞髮登羅浮金

沙香難覲玄珠偕所求
天長積遠思歲晏懷殷憂
馳暉不可駐江介遲歸舟

歸舟夙云邁操袂大江陲
一為千里別晤言難重期
余方憂鬢髮君自媚眉姿
山川曠修阻安得長追隨
玄素諒不睽臨路何足悲

臨路何所陳策身苦不早良
馬疲皁櫪應龍困泥淖刺
繡難為工操瑟非予好
懽誤未及營驅馳已衰老
青黃信木災被褐懷其實

被褐守環堵舉目無相親
汎覽窮鐵摘沉思鑄瑋言藜
藿雖不充容色無比倫
田疇洵奇士魯連稱達人君子
慎末路榮名重千鈞

虬峯精舍為謝尉賦

匡山峙東南積阻帶晴霓
蜿蜒三百里峰巒轉漸絕屹
立睨中原高擎拄天闕
下有藏真士散髮弄松雪
時來起淵潛道味乃井深
薜蘿愜幽貞藂桂樹芳烈
行藏豈不榮白黑因所說
方追洪厓蹤距迷巨卿轍
願言就松

金
門揮杯共明月

櫟園精舍為潘子朋賦

矯志事幽棲結宇依空林
豈無嘉樹枝息此散木陰
達人守淵谷遁思常陸沉
青黃豈不貴文繡非所任
遊言翳蓬藿諧我忘世心
班草話平生寓目託嶽岑
飛潛理自足榮賤行相尋
蕭寥答天籟葛天有遺音

瑤石山人稿卷二

欽定四庫全書

集部

瑤石山人稿卷四

詳校官監察御史_臣曹坦

中書_臣劉源溥覆勘

總校官編修_臣王燕緒

校對官中書_臣吳甸華

謄錄監生_臣朱紱

欽定四庫全書

瑶石山人稿卷三

明 黎民表 撰

七言古詩

木假山歌為鄺子乾作

越城古檜青虬枝萬仞孤生滄海湄繁陰婀娜巢鵲鳳
盤根偃蹇藏蛟螭明堂大厦應難致匠石揮斤幾回棄
礪礪已受風霜蝕峻嶺會有雲霄氣山人家在扶溪邊

邂逅神物心欣然解驂推食豈足數移置此物當楹前
旋開北堂上坐我幽壑中眼前突兀見青嶂繞室慘淡
來悲風初疑天台雁蕩凌紫煙中有丹梯駕日相連連
又疑巨靈遠擎崑崙丘下有黃河萬派噴薄之飛流陰
陽為炭何年鑄至人徃徃能冥搜迢迢紫沂海鬱鬱三
神山萃律在何所無廼虛無間就中拳石足怡悅胡為
跋踖凋朱顏不如阿堵裏更著黃綺翁絃琴坐白石散
髮呼松風平泉良嶽知何在惟有綠樹搖青空

飛花曲

長安戚里競春陽桃李花開夾道傍
遙裔鸛煙籠上苑
丰茸鷄樹邇明光濯錦含霞非一色
刻翠施紅映朝日
同心竝蒂引鴛鴦接葉交枝棲鳳翼
西第東隣望不迷
溶溶宛宛復淒淒歌殘玉樹飄成陣
曲罷山薌踏作泥
婉態柔情分綽約不與春光共銷鑠
初拂交疏入綺窓
徑度華池上青閣綺窓青閣盛佳人
二八蛾眉不解頻
紅牙度曲梁塵起銀甲搗箏壁月新
碧複雲屏畫不開

鶯啼燕語空徘徊慵粧未進雕胡飯攬帶方臨玉鏡臺
摘盡板條還自愛睡起曾無一枝在恹恹迸淚乍停機
脉脉煎心翻解佩昔時爛漫空相惜今日凋零竟何益
寧知歲月損鉛華寧謂風光類彈射萬事相看成轉蓬
朝居裊褥暮塵中安陵坐棄前魚泣長信恒悲團扇風
富貴榮華須及時烹羊炮羔君莫辭清歌窈窕芙蓉帳
美酒蒲萄金屈卮高陽酒徒良不惡執戟何如草玄樂
誰肯低頭拜七貴誰能閉戶窮三略莫歎飛花太薄情

可憐全盛易驕盈銅駝陌上荒荆棘金爵臺前漳水聲
同關中楊勗肖宋璫傳以忠吳暉王養蒙西蜀鄧

合何采燕集

朔風驅塵暗青草蟬聲夕滿燕山道豪貴相逢不揖鞭
却走城南事幽討城南淨域敞青蓮悠悠鐘磬出人天
綠水宛通秦苑樹繁花常帶漢陵烟寓目遊情無不有
却典貂襜為沽酒紫綺初飄陌上桑銀鞍却繫門前柳
座中豪士本三秦西蜀才人併足珍手攬雲霞揮日月

律調霜雪變陽春不分勛名歸汗馬常思稱納上麒麟
邇來索米長安市伏櫪悲鳴絕知己擊筑誰知高漸離
鼓琴未遇鍾期子就來論交應最深莫比悠悠行路心
孟公痛飲猶投轄季子窮途尚剖金邀懽未久又傷離
汎梗飄蓬無定期滄江白石搖歸興隴樹秦雲入夢思
予亦翻飛向越城幾回秋月向人明他年漢主隆詞賦
應念雄文似長卿

僊鶴花異植也青跗素萼狀類胎禽即嵇含草木

記所謂鶴草也觀自隨時山人余因命舍弟為
圖系以此作

青蹊窈窕連雲上芝草琅玕萃森莢玉蕊飄飄間藥開
瑤蕤的的緣溪長何年華表舞胎仙綺翼霜毫勢宛然
秀方蔭蔔深能淺馥儷優羅色更鮮五鳥杖頭羞綽約
三花樹裏鬪嬌妍駢素含香在遙巘幾度春風落如霰
舞蝶縈枝乍可尋來禽隔水紛難見空谷幽人覓紫芝
靜聞芳氣遠相隨暫移僊種歸玄圃思植靈根在赤墀

月滿空林露未銷
碧海青天思寂寥
倘遇緱山王子晉
願隨風馬聽鸞簫

天台山障歌為上舍歐載卿賦

僊閭五嶽玄風迴
福地三山真氣孤
烟雲襍沓見青嶂
知是何處曼絕之
清都披圖驗往牒
無廼天台山東南
屹地軸灑落重溟
間張生東吳號痴
絕十年蹤迹窮追
攀胸中盡吞雲夢
澤筆下橫掃凌荆
闕經營滄海赤岸
萬里之玄濤意匠
縹緲真宰號忽從
波中涌實地稍向

浦溆分漁舸又寫風烟之九曲古樹聯綿走平陸高人
夜雪迴扁舟初日鶯啼上修竹青蹊此去入雲林扣舷
時聞樵采音碧桃花落紛如霧家住秦人深復深探奇
歷險恣窺窕却在雲中躡層嶠石梁倒駕垂蒼虬霞標
直上干朱鳥迴流飛瀑何泠泠遠視但見銀為城巉壁
莓苔經日月崇祠祠柏剝丹青金支翠旗颯羽衛斑麟
白虎紛相迎飄飄雲氣似可即我欲散髮呼僊童起來
行歎復坐思不覺惻惻令心悲狂遊汗漫竟何有黃塵

汚衣眼迷津秋霜夜夜凋玄草春雨年年長白芝山澤
之儒知在無我今結束胡為乎盤囊絲絡蒼精劍玉京
渺渺從雙鳬謝康樂孫興公精靈往來空山中文采風
流今已矣汲泉採藥行當逢夜登天壇見海日朝驅列
缺從罡風陽烏顧兔反在下笑駕樓船弱水東

秋風三疊

秋風嫋嫋流清商朱華零落綠草黃明月委隙廻素光
寒蟬夜啼候鴈翔膏爐沉燎朱火揚空房獨宿私自傷

凝思關山繞羊腸杳難致之雙明璫縻蕪易秀菊易芳
君何遠遊長相望

秋風淅淅玄夜狙黼帷高張華燭孤嚴霜被野鳴蟋蟀
塞鴻沙鵝相喧呼慘慘白露棲庭蕪迴身悃閣愁且盱
不覺涕泗沾衣裾白雲在天丘陵紆杳難致之紅羅襦
梁間夕鳥猶相於別長會促誰與須

秋風淒淒霜霏霏薄寒夜透琉璃扉玄蟬抱枝露氣微
疎燈耿耿流黃機中房淚下如綆縻金方路遙消息稀

杳難致之雙明璣三星煌煌承夜輝何為淹留憶忘歸
劉明遠松石圖為鄭子乾作

劉生善畫兼能書材力却與凡工殊千金為壽不一顧
下筆頗獲驪龍珠凡花俗卉豈足竒貌此千仞磊落之
雄姿左盤右蹙勢爭長崩崖巨石相撐撐皴皮剥盡風
雨幹勁鐵屈作珊瑚枝蒼厓縞皓灑飛雪晴空天糾奔
鸞螭太陰冥冥氣慄怒疑是巨靈揮斤之所為鄭君高
堂懸此障階下迸泉倏排蕩四旁觀者寂不言頓覺丹

青色凋喪我生好古悲已遲五羊從前多畫師林良待
詔金鑾殿劉也奔騰真數奇欲遣巫陽不可招抱膝對
爾興長謠秦封禹貢何瑣瑣看爾直幹凌烟霄

答歐楨伯長歌見懷之作

天風木葉落江南應早秋故人何處住夢想在沙洲沙
洲曠望彌芳渚桂檝棠舟自容與零露朝溥五色芝輕
霜秋熟千頭樹憐君幽尚結精廬抱膝躬耕讀道書龍
額何年封李廣狗監猶未識相如翻飛本謂雲中鵠垂

耳今為轅下駒憶我別君顏色久去去天涯屢回首玄
朔風高豺虎驕黃河日落蛟鼉吼金門上書不得意落
魄風塵在人後推眉折翼還歸來寥落寒山對窓牖結
駟誰知環堵貧金貂應笑牛衣醜悠悠世事那復論抵
合狂歌飲醇酒桃哀已死不復生見爾交情不相負琅
玕贈我光陸離始知風雅未全衰垂名本是大夫事莫
謂揚雄壯不為

碧桃花長句

上林珍藥競芳菲，姑射幽悰本自持。
龍葱掩月瑤臺扇，皎潔臨風玉樹枝。
露井寒輕鶯尚澁，虹梁日暖燕初窺。
施玄似汙連城色，結綠偏宜照夜姿。
不同隴首飄風早，願言度索結芳遲。
美人詒贈方璫玖，素影盈盈照窓牖。
搏成香霧覲難消，點綴雲英瑩逾久。
宛轉冰紉半入懷，的皪霓衣小垂手。
繁艷朝窺北里墻，輕霏夕灑臨邛酒。
輕霏繁艷正堪憐，青萼芳蕤簇絳烟。
都荔胡繩慙酷烈，蘭茝翡翠避相鮮。
秦人鷄犬曾迷姓，方朔詼諧遂得仙。

別有深宮愁日暮二八年時坐虛度纖腰束素楚王憐
廣額塗黃漢宮妬蜂鬚蝶翅芳緒闌蕙樓茵閣羅衣單
階前玉露生愁色鏡裏鉛華失舊懽

白蓮長句和公實

九春芳物已凋殘百舌聲中興轉闌東園有恨成蹊易
南國無媒寄遠難成蹊寄遠空惆悵素萼青跣忽搖漾
娟娟金莖瑞霧通霏霏玉井香雲上玉井金莖不易逢
綠葉田田復幾重鷺窺冰彩愁難定蝶繞檀心恨正濃

鷺窺蝶繞疎華動幽香更倩迴風送輕綃似出鮫人織
明珠乍見江婁弄迴塘曲水日初長妖姬妖女自相將
但識漢宮持作蓋寧知楚客製為裳照影競窺眉上綠
凌波爭比額邊黃長裾蕩縈憐絲眉皓腕攀條畏刺傷
直謂將心同白日始知行樂在青陽青陽白日去悠悠
幾度相思南陌頭嬌靨只矜如月滿繁華須念逐波流
銀床寂寞翻清露紈扇淒涼及早秋年催已畏傾筐盡
晝短何妨秉燭遊風撼銅鋪難獨守星迴金屋迥添愁

願學漢臯能解佩還同河徼善操舟操舟解佩憐君久
棄置紅顏相憶否空持白璧誤投人為少黃金能取酒
妾意頻驚桃李時君來已及芳菲後行路羞看陌上蓬
連根願比池中藕采蓮日暮綠江深因君哀怨進謳吟
鴻來不憚關山遠菱唱還過越水潯

僕窮居方丈之室覩時事有鬱抑於中者欲默則
不能欲言則不可因作五歌以遣意冀輶軒之
使有聞焉

沉珠浦前惡氣起玄甲朱裳附如蟻紅旗五大畫蚩尤
海艚掠盡行商死廟堂肉食運權謀刀尺紛紛搔獄市
街衢橫屍君不聞調燮安能輔天子

去年斥鹵猶有苗今歲膏場若無草漁人雖收網苦功
農夫夙夜憂不飽皇天旱潦自有時渾沌終傷鑿機巧
出門語塞不得言仰視浮雲色枯槁

買香南海千餘日昔日十家空九室惡風巨舶不復來
官府懸金費要質已聞闕門閒斥堠復見宮中祠太乙

君王蚤晚罷輪臺江湖私願從茲畢

四方郡國皆太平唯有粵南多戰爭攻城劫藏無虛日
曠野蕭蕭聞哭聲我軍纔出又獻捷椎牛醢酒霑冠纓
沙場本是征人死何用防秋苦募兵

乘車戴笠何後先粵人重交從古然邇來雲雨成翻覆
祇有箕豆相熬煎屈原反遭申蘭妬尼父空羞盜跖賢
我生本是忘機者痛哭應慙賈少年

送易居士還雲臺山

瓢僊昔隱雲臺山懸峰側徑常追攀又從蒼梧泛溟海
窮搜始入羅浮間身上木皮常百結匣裏蓮花帶雙珎
朱門豪貴眼曾經塵世功名口羞說逢子謂是餐霞人
過款南窓動旬月伏火常思勾漏砂烹茶屢憶蛾眉雪
有時半醉插雲烟代輿負嶠當眼前神龍跋浪騰玄圃
大鵬舉翼凌蒼天新縑偏掩籠鵝帖濁酒何須挂杖錢
抵掌論心方未已海思江情倏然起玉鳥朝翔庾嶺雲
霓衣夜渡貪泉水把君衣袂還相憐看君神氣何凜然

爰居豈樂鐘鼓響麒麟不受珊瑚鞭要窺龍漢經浩劫
下視滄海猶桑田緱山一別堪惆悵華表歸來又幾年

贈寫真張山人孟易

張君少小傳家學粉繪新詩何磊落初倣林良畫花鳥
近日白描能間作精心苦藝誰得知下筆翩翩氣盤礴
松煤雪繭相映光勢似流雲載飛鶴移床脫帽當前楹
倏見山姿在丘壑荷衣蕙帶翻從風細紋瑣額咸隱鋒
英芝瑶草在階下兩旁古木皆巃嵒向前摩挲始覺異

僧繇醉旭將無同爾今技成何所羨
褰裳便欲翔燕甸
黃金白壁意自輕
凌烟擬為開生面
曳裾擁笏過王侯
瑊盤錦席羅珍羞
貂裘懶復事遊說
白石空歌獨飯牛
人生快意百不憂
鴻冥鵠舉君莫留
魯人今日輕家丘
余將獻賦長楊去
為結鷗鵬萬里遊

畲徐山人

東風二月沙塵起
旅邸相逢徐孺子
敝裘短褐常不完
素髮蕭蕭垂過耳
往年書記雲中城
五侯書幣來相迎

聽葭不獨知風角聚米兼能畫地形擬使陰山無黠虜
坐清沙漠報承明紈袴之徒何碌碌衛青本自興奴僕
鸚鵡才高不受羈汗馬功多誰見錄歸來環堵空蕭然
萬卷丹書徒在腹天涯過我情更親勸予俛首甘風塵
高冠大爵世豈乏何必文章能致身我謝君言良太苦
九牛一毛何足數丹青本自圖岑鄧汗竹誰曾薄巢許
幹旋造化由羣公蘇息蒼生賴明主石田茆屋可盤桓
閣皂羅浮相對看緇塵汗衣且歸去秋風落盡青琅玕

送鄺和仲之鬱林

鄺君視我同門友廿載交情最相厚下筆翩翩掣鳳皇
一代詞人盡回首少年折桂登皇畿黃金臺上傾珠璣
直氣屢干星象表赤手欲補山龍衣綿袍旅邸無人薦
金馬門前稀召見起家纔得中大夫出守遙臨舊京甸
摧眉伏謁意所輕卧治烹鮮徒有名推轂不聞思魏尚
催科誰復識陽城以茲修途還折翼世路羊腸堪嘆息
白衣蒼狗在須臾騏驎駕駘同一樞嗟君宦拙誠足悲

美君有才何不宜朝廷側席思化理蒼生引領蘇瘡痍
行部倘過勾漏洞吸古可讀羅池碑大夫遭逢信不偶
雌伏雄飛會有時我今風塵胡見羈效顰半額羞蛾眉
江臯已綠王孫草烟雨欲折商顏芝慈親倚門待吾歸
孤帆破浪杳然去贈君萬里遥相思

送羅山甫歸金壇

君不見句曲之山橫已字三峰巉巖勢相似金庭地肺
杳莫窺上盤天文下地理前有大茆君後有楊長史膺

圖受錄稱上真煉石燒丹求不死隱居之後瑣瑣爾十
簞猶存九錫風清虛不救臺城恥翰墨長留天地間琅
玕散落烟霞裡古柏摧殘元氣裂龍池可以洗君耳華
陽幼僊羅山甫早歲餐芝思脫屣風流遠躡二子踪字
藝之工亦其比三十無人是知己黃河之清詎能俟前
年裏足遊帝京幾度悲歌飲燕市布衣不得謁公卿詞
塲唯許交徐李翻然更作出塞遊擬樹奇功報天子風
塵蹙蹙不可留劒氣談鋒徒礮礪上書羞蹈終南徑垂

釣空思五湖水只今豺虎多啖爭主持正賴周中興君
期歲暮探雲谷余亦秋風發廣陵海鵠沙鴻不可羈水
遠山長無盡期他時肯覓朱明洞叩門一訪軒轅師

經季子祠

古木叢祠走狐兔南北行人往來路墳前松樹摧折枝
猶是當時留劍處古來賢達何紛紛生死交情只有君
不獨片言輕尺璧能將千乘等浮雲可憐祠下東流水
世事悠悠亦如此田實相傾又一時寧保升沉不相棄

失路狂生笑向天悲歌中夜思公子

桂之樹行

桂之樹枝葉一何紛披託根三山陽流輝南海湄隆冬
霜露常不衰扳桂之枝仰母慈雲衣霓帶皇所綏榮光
煒煜無休期丹穴之鳥將來儀桂之樹其實何離離惟
母有子載以馳南觀上元西瑤池鳴鳩均平巢樹枝嶺
海之岷飽而嬉非母之德嗟何為猗桂樹壽無極長江
如虹流不息跋鳥之飛矯其翼何以壽母此其匹於萬

斯年保貞吉

送梁尚寶宣伯冊封還朝

毅皇昔在承平日廊廟幾人秉周禮文康玉立當青霄
遇事引經持大體逆耳每叫巫陽閣薦賢屢有三公啟
元氣當時賴斟酌蒼生至今無瘡痍手持璽紱迎代輿
却早抽身辭楚醴榮枯翻覆那可常回首台階一流涕
憐君傑出稱鳳毛少年聲價推詞曹丰儀磊落見孤鶴
步驟英賢遺佩刀只今銜命窺江湖虎符龍節藩王趨

雕盤翠釜勸餐飯皓齒蛾眉喧坐隅麾金應羨楊夫子
授簡何慚楚大夫三湘洞庭渺在望日暮歸心愁綠蕪
翻飛更向黃金臺五雲垂采輝蓬萊霜前驛路牙旗轉
海上樓船清吹哀人生快意有如此君恩未報胡為哉
酒闌牽衣且徘徊中原羽檄飛塵埃宵衣正切河南地
按劍直待諸侯來看君稱納麒麟殿不愧萬里騰驤材
送梁思伯遊燕兼赴故人吳給事匡廬之約

梁生倜儻非凡儔家世况廼平津侯前年束書走燕趙

布衣屢作金門遊，長安貴客競迎致。
生也拂袂仍丹丘，歸來二頃無負郭。
茅屋秋風自蕭索，壺觴誰過仲長園。
校讐空哂揚雲閣，翻然更作江湖遊。
知有心期在廬岳，出門大笑誰絕羣。
浮雲萬里忽相踰，鴻鵠從來羞燕雀。
驂騑寧復顧輶馭，江城貰酒與君別。
美人當筵歌一闋，南陌衣冠聚似雲。
東園桃李飛成雪，丈夫此去豈長貧。
律兀黃金可致身，萬國星躔環紫禁。
五陵意氣驕青春，徐樂公車相待久。
賦獻河東未白首，羅浮應有倦遊人。

書來更道相思否

鄒將軍平寇歌

大羅之山莽回互石林峩寧盤西楚懸梯織鐵難躋攀
朝啼鼙鼙夜猛虎茆棚竹箐何縱橫三峽黃昏怨行估
上書無人扣北闕忍使蒼生茹荼苦丙辰之歲尤跳梁
羽檄交馳震霆怒樓船下瀨遙出師詔遣將軍持繡斧
荆蠻象郡抽精銳灘水湟川動鼙鼓陰厓殺氣迴長風
白日精靈泣飛雨將軍功成振凱歸大旱為霖救焦土

伏波銅柱安足誇崑崙之捷可重覩問君謀畧何太奇
昔日東吳遏倭虜丹書獸錦從天下大纛高牙自能取
吁嗟四海今承平南粵再見烟塵清明珠貢篚歲豈乏
玉門斥堠無脩營更煩牛酒休軍士函谷封泥不用兵
送親大黃廷寅應貢北上

孝宗之朝多俊賢金堂玉樹巢神僊中郎致身何坦蕩
長離舉翼當雲天君臣契合在人耳更有子姓能聯翩
季也森然見奇幹庭堦却立春風妍腹中萬卷何磅礴

錦繡璣衡互參錯班嗣書多不借人相如劒成應恥學
登臺自倚輕千金閉戶那知困三畧青衫白首何足悲
樹幟詞塲氣益奇賢良對策公孫子側席英才正此時
首夏辭家望京闕三江五湖坐超越桂樹秋風幾自攀
芳草天涯未應歇龍陽秀色滿鄉關知爾承恩霄漢間
玉河橋畔逢五弟為道冥鴻戀碧山

以李薊丘竹木荒寒圖贈潘少承

大漠飛霜沒平野見此森然挺奇秀蒼苔剝落龍鱗粗

翠篠蒙龍石稜瘦野火燒殘霹靂餘爽氣高標颯回首
佳人絕代卧空谷賢士羈孤成老醜何人貌此真苦心
古法兼應存篆籀異代流傳李薊丘父子聲名在人口
輕縑古墨兩相投粉繪丹青俱落後潘生好事偶見之
以手摩挲嘆良久置身恍在顛厓間撓呵恐作蛟龍走
錦標鈿軸裝重池持歸不用連城購潘生相就仍索詩
為爾重增遇合悲杜陵桃竹或變化張公寶劒能雄雌
千金敝帚登廊廟肯使瑰材委路歧

題訶林異上人奇峰精舍

城西古樹枝相樛云是神僧手所植青皮赤文十抱強
虎攫蚪奔人莫識幾度摩娑行樹底爽氣陰風振泉石
頃來溽暑常伏枕悵望禪栖杳難即清晨剝啄聞扣門
倏見礫砢懸素壁雪山靈草光照眼祇園寶花亂相射
跏趺座上爾為誰龐眉電目仍霜髭楞伽萬遍口能誦
毗邪大室身不移白茆况邇訶林井大士曹溪曾灌頂
勝地猶依龍象力清地屢照鸞凰影吾師日長繞百過

雨折風披何碎瑣香鑪仙樂知有無寶勝銖衣飄婀娜
只今甲子旬五日種花誰見還成果予生苦遭塵網縛
依止清涼無不可此圖此樹俱幻迹況涉言詞計應左
披圖且謝門徒歸野客吟成山葉墮

送李尚寶伯承弟仲連歸濮陽

李侯芳譽騰青雲更有愛弟能攻文擔簦遠來遊上國
歷塊丰神傾昔聞共着斑衣奉慈母滿挹黃封起為壽
謝庭玉樹迺連枝玄圃靈芝競三秀兄也委身奉明主

弟也翻飛向林藪誰肯咸陽作布衣却待燕臺收馬首
兩情去住正堪憐歧路還逢雨雪天堯祠蒼莽望中斷
濮水潺湲何處邊青門羣公爭祖席知爾思歸留不得
雲霄豪舉詎為難麟角鳳毛人共識池塘別後句應成
寶月流輝在玉京倚門子獨勞歸夢鴻鴈南飛少寄聲

僊人白鹿圖同高比部伯宗作

長安日暮塵沙愁張鐙置酒客為留青山忽然在旅舍
滿堂木葉風颭颭山下長松復崛強徑路逼側巖石幽

黃冠似是僊人流控馭白鹿如龍蚪神情森爽散冰雪
紫芝照耀青雲裘琅函玉斧挿翠籠羽扇冰弦挂杖頭
將凌三山窮五岳暫遊少別俱千秋白茆反瑣守丹朮
洞門欲去還夷猶吁嗟此圖僅盈尺能令坐客開胸臆
散髮思攀嶺上雲枕流願得溪中石名羈利絀為何人
羨爾霞蹤少拘迫我家行來歲月久白鶴玄猿怨蕭索
訶林實落虞翻苑金汭煙銷葛洪宅低頭眊眊胡為乎
瑤草琪花夢中隔遠討湏尋縮地方思歸終假排空翮

送陳僉憲于舜之任浙中

蜀西使君才且雄
繡衣謁帝明光宮
紫髯白面驚左右
劇談吐論回悲風
金鍾翠釜世希有
紫電掣曳凡馬空
興來落筆滿毫素
片片青天飛白虹
朝迴遇我長安陌
謂是夷門抱關客
亟呼美酒登高樓
蛾眉千金輕一擲
是時春盡寒雲愁
楊花糝糝紫芳洲
金羈馳驟塵沙起
萬里不見黃河流
拔劍起舞君且留
茫茫世事空百憂
五陵豪俠散烟霧
魏國平原今在否
酒闌看君雙玉玦

會稽茫茫不可越乘興還從剡曲舟相思空寄樟亭月
樟亭月色滿荷花青山綠水擁鳴笳誰隣金馬羈棲客
悵望銀河博望槎

送王生遊關中兼赴喻中丞之招

王生竭來厭湖海乘屩直入雲臺山雲臺峰高障白帝
蓮花秀色開函關秦封漢時紛蟻垤龍爭麟鬪如等閒
叔孫禮樂不暇數賈誼過秦文最古婁生脫輓從東來
形勢興亡若目覩嗟哉二子曠世之雄奇生也磊落能

當之文章少年薄騷雅行藏壯氣仍孤羈黃金臺前擊
短筑少婦閨中賦戾戾星河可望不可即推轂雲霄知
是誰西遊候吏能物色開府才人舊相識意氣偏輕范
叔袍笑談肯恡虞卿璧請纓便可擊名王手寧繁弱揮
天狼解紛排難見胸臆功成不顧尚書郎平原之遊亟
回首風光已綠蕪城柳祈連新塚生莓苔何似菱歌酌
春酒

秋夜過王庫部定甫觀元人趙原山水小幅因題

其後

荆關神妙世希有
莒國山人亦名手
意匠經營頗逼真
水石山林氣森秀
剡藤一幅纔盈咫
萬穴千巖俱點就
芙蓉開萼迤太清
星宿匯流欸崇岫
陂陀映帶粘箴莎
礧石縱橫走泉溜
日出初分意色濃
秋高始脫烟霞瘦
吮粉含丹無此流
北苑營丘合回首
王君好事偶得之
槩几雲房頓覺奇
况當燕市風塵日
見此溪山罨畫姿
泠然便覺心神披
嚴霜撲人葉辭枝
翠眉更進金屈卮

白雲在天河漢移醉來騎馬忘南北桐葉分題賦小詩
襍言題劉仲恭少巖圖

何雲霧之燦舊而苔蘚之爛斑劃層崖之中斷聞流水
之潺湲長松蕭瑟散筇筑冷風載鶴而往還納長春之
景耀駐日月於山間意蓬瀛之不可涉兮曰太行之歟
巖走千里而開壺闕懸梯織鐵倚天壁金堂玉雷非塵
寰帝令倏忽鑿渾沌翬龍之子來追攀面岑青兮翠觀
列蕙榜兮蘭室繞九光以怡顏鍊五石而永日步徙倚

以忘歸撫榮觀其如失雖封珪與縹組終櫻情乎茲術
噫丹青之紛詭兮乃氣象之移人豈予見似而驚昭兮
知久蹭蹬乎風塵君候千里騷擾之身白環世業方嶙
峴安能從黃石而脫屣望清溪而垂綸

哀莆中王子世廉俠士也愍閩嶠之亂作為此歌
予讀之泫然亦同作焉

霜拂壺公無紫氣惡氛剪斷蘭陂水城中斗潦直千錢
鐵壁重闕裂如紙兒啼女哭不得將十萬居人同日死

虹蜺蔽日顏無光毒蠱含沙海霧黃官軍重入收餘燼
士卒馮凌轉創傷吁嗟二百年來久海上烽烟從癸丑
徽饒行賈多緡金漳泉篙師稱好手七國連謀敗晁錯
百年為戎嘆辛有可憐枉死朱中丞東濕無功成禍首
皇天厄運誠可悲翡翠琅玕亦殺機王恢失計真堪恨
殷浩虛名徒爾為腐儒藿食憂誠拙借箸前籌亦未遲
虎符急下潮陽戍三版孤城好出師

送吳約卿西巡訊張助甫

男兒不成名老當死蓬蒿一朝被遇風雲起躡登卿相
如鴻毛僕也江湖淪落士抱關竊伏長安市茶澤甘為
憔悴人穰侯却忌縱橫子青雲之客誰相親九牛一毛
何足齒荆南吳公才絕倫念我鹽車蹭蹬身春花秋月
常邀致剖玉傾金不厭頻十月西行肅行李為購宛駒
報天子錦節朝馳馬服山金笳夜渡黎陽水故人為郡
在淦城千騎雙旌來送迎推轂無人思魏尚停驂今日
挹侯羸勞勞下馬傾尊處須憶青藜卧漢京

曾繕部以三招余過楨伯館以事不赴有詩見貽
因和會之

華陽高館向夜開嚴霜拂面如飛埃愧我驅馳猶未息
南陌東城復幾回水部梅花清興發招邀月下傾金罍
可惜佳期竟虛度主人不樂為停盃城頭紉紉鼓聲下
碧雲愁暮空徘徊風塵湏洞誰憐才昭王駿骨成驚駘
鮑叔分金憐管仲左桃忍死推羊哀今人結交不重義
斯道棄之如草萊雲天高誼乃見爾以膠投漆差堪儼

曾聞懷友出關門轉見悲歌覓燕市明堂棟棟日經營
華省移文要綱紀多暇猶能過我曹露膽傾肝向知己
魚目難酬明月珠陽春却入巴人耳只今西北烽塵起
四郊多壘國之恥摧眉伏櫪將何為手執龍淵報天子
功成當看畫麒麟拂衣歸釣滄溟水

瑤石山人稿卷三